

鈴山堂集

吟山堂集卷第三十二目錄

墓誌銘 表 傳

溧陽徐夫人墓表

封大淑人王氏墓碣銘

太淑人栢氏墓誌銘

淑人王氏墓誌銘

封太淑人李氏墓誌銘

封恭人秦氏墓誌銘

封安人陶氏墓誌銘

太孺人阮氏墓誌銘

安人周氏墓誌銘

封安人高氏墓誌銘

封宜人范氏墓誌銘

封太孺人呂氏墓誌銘

御史朱君妻封孺人墓誌銘

鄉進士唐君妻墓誌銘

華母傳

鈴山堂集卷第三十二

墓誌銘

溧陽徐夫人墓表

南京光祿少卿朝列大夫史公諱後之夫人徐氏以
嘉靖十三年閏二月甲寅卒以十一月壬寅葬從光
祿公之墓而其子進士際請予詞刻於隧首之石嗚
呼光祿公之歿橫罹讒誣聞者傷之矣當是時際子
然立外侮叢至坎懍萬狀夫人銜茹悲苦獨撫其子
曰往成汝學必力以無墜父志際感奮折節才譽隱
起一時名卿文士無不知之者由是舉進士甲科試

政銓曹會奉詔使南方便道歸省夫人命服拜床下
時天人已寢疾一見歡甚既而悲不自勝母子相泣
閭里聚觀歎息曰幸哉有子乃再振厥世夫人之教
也蓋越兩月而夫人卒際克盡力後事云徐氏惟中
山王開國勳第一世享爵秩碩大顯盛夫人王七世
孫太子太傅魏國莊靖公之季女太子太傅成國莊
簡公之外孫也蕃愛稠息弗輕許字光祿公舉進士
為南京刑科給事中有盛名莊靖一兒器之遂許妻
焉夫人柔明砥慎相其夫以正而順舅其姑以敬撫
騰御以寬際前配王出也蓋視育之世已所出嗚呼

能不恃其貴富而克盡其行己之道由四院佛樓之來
而安處之以俟夫天之定此學士大夫之所難也而
以女子能之豈不賢哉石門之阡仞儻同藏厥澤孔
延來者其昌乎

封太淑人王氏墓碣銘

太淑人王氏吏部侍郎徐公縉之母也始公之考封
君諱潮元配沈氏父無嗣聞太淑人在室有賢稱乃
受于王之廟而歸太淑人既入門敬以承舅姑恭以
順夫嫡徐故碩宗也家食干指泉貨出納之度先祭
賓燕之需男女耕織之業僮僕之役其食飲服用盈

縮之節緒錯絲焚莫之適理太淑人躬任其勞凡所處畫條度整然而沈夫人自讓其能遂授以家政上下仰成焉封君逸老湖山寄興吟咏築室治圃以奉親爲樂曾不內顧者繫太淑人是賴太淑人生二子長即吏部公次曰紳吏部舉進士入翰林爲編修以初考得貶封沈而王例不獲封逮侍 今上于講幄擢戴銓曹於是太淑人始有今封使者捧誥書至第衆以爲榮然太淑人不色喜曰封君之弗逮也既而公遭誣賤乃至落職以歸衆以爲惜然太淑人不色愠曰誇起無稽而成於不察過不在子也君子謂太

淑人明于大誼令于慈誨可不謂賢乎女一適而
雍孫男六女度玄慶玄成玄齡玄理玄佐生景泰壬
申四月廿六日卒嘉靖壬寅七月十三日享年八十
有九葬以明年癸卯二月十日墓在吳縣西洞庭金
鐸山從封君之兆吏部以書來告嵩使刻詞隧首之
石嵩獲交於公四十年視若弟昆誼不得辭謹敘而
系之以銘銘曰

猗嗟淑人夙稟懿質昔在若考慎所攸匹爰歸于徐
宜其家室孝媚諸姑敬順弗失克勤任事肅共翼翼
亦既有子展也大成博綜墳籍蔚爲儒英爰自文苑

遂陟銓衡誥書煌煌言即干第圯首金葩龍文雙峙
介福名堂維 帝之制始造之艱晚則多祉古稱媿
耦萬福之原不觀夫人實大徐門以引勿替蟄蟄後
昆勒詞貞石以永其存

太淑人栢氏墓誌銘

太淑人栢氏錦衣衛都指揮僉事諱珍父也被選為
憲廟賢妃其姊也榮祿大夫左軍都督府都督同
知袁公諱彬舅也初授中書舍人繼襲錦衣衛都指
揮僉事諱熹其夫也初榮祿公起行伍扈從 英宗
皇帝北狩艱危翊護實懋厥功天順復辟即拜錦衣

陝督府恩寵冠一時太淑人來歸其門族類慕
見其有驕盈之色傲事舅姑順承夫子仁卹媼族內
外稱宜焉生天順己卯七月一日卒嘉靖己丑七月
二十八日其壽七十有一九月二十二日合葬都城
東北花園之原子三人長天章錦衣都指揮僉事管
鎮撫司事次某某先卒女二適都指揮狄唐錦衣指
揮張達孫一人良懋將葬天章以予鄉人也故來請

銘銘曰

烈烈榮祿扈蹕沙漠險難周旋執事有恪虞淵日浴
渤海龍翔錫命酬勲祭戟旂常燕及嗣人休有耿光

婉婉夫人 帝妃之姊來嬪表宗職饋主祭歲時來
寧列侯戚里文駟雕軒錯繡紛綺維貴弗盈維富弗
有載其德仁以峙永久孰豐其川弗羨其源都城之
東鬱鬱崇原夫也同藏松楸日繁滌美昭先俾世勿
謾

淑人王氏墓誌銘

淑人王氏京師人歸于張爲錦衣指揮使某之次室
年六十有四以嘉靖十年二月十日卒于乾寧之里
第惟張氏爲國戚里爵號命書燕及宗親顯盛先大
淑人每至京師入朝 昭聖康惠慈壽皇太后留侍

眷之翟雞文錦之袍寶簪珠珥之飾簪鏡珍異之饌
資予甚厚時顧問家焉及閭閻民隱淑人敷對有儀
凡可惠利下人者力替成之人以是稱其賢錦衣君
元配金氏淑人佐之執謙敦素罔有違言門內與與
如也淑人生子一人曰偉蚤世女三人長適魏國公
徐鵬舉次適瑞安侯王橋次適恭順侯吳世興子某
淑人之卒也 昭聖聞計遣中官賜奠賻是年五月
日葬祔于先塋之次於是太師昌國公謀于宗人
曰叔母有賢德葬宜有銘示後迺來請銘銘曰
託靈椒塗慶之多朝于內庭服委佗姻戚來壽車駢

羅流其下世傷如何銘勒玄石永弗磨

封太淑人李氏墓誌銘

兵部尚書楊公總督陝西邊務之三年母封太淑人李氏卒于固原督府之寢嘉靖二十二年十一月十四日也年八十有一先是尚書以太淑人年高疏乞休致歸養上以邊場事殷詔奪之俸二級既乃黠虜犯邊公督師擊之績聞詔復其俸加太子少保君子曰賢哉楊公不遺親孝也勤事忠也至是有司議太淑人卹典詔遣官賜祭葬如例而厥考贈尚書魏翁歿且葬若干年於是并賜祭以從公之請蓋異數

云太淑人姓李氏家世蒲州人生而雅重不妄笑言
歸匏翁以孝謹稱翁筮仕幕職歷佐州郡以伉直忤
貴倖屢頽顛沛至空囊以歸太淑人浣衣蔬食自若
生今尚書公少雄畧有氣蘄然見頭角太淑人雖竒
之意嘗抑之不假以色辭尚書舉進士授戶部主事
陞僉事副使謫通判起爲山東布政使右副都御史
巡撫四川遭誣訐家食三年復起叅政河南陞浙江
按察使尋巡撫寧夏以陟今官太淑人皆至官食其
祿既屬疾念匏翁每欲置義田贍族弗果而尚書已
割俸歸管其事則喜曰子克成先志吾無憾矣子男

七人長守仁次守義次即尚書公守禮次守智守信
守廉守潔女四孫男十五曾孫男二尚書卜以年
月日合祔於窆翁之兆而書來屬銘其墓謹按
春秋之義母以子貴豈獨以貴又因以徵其賢焉尚
書功在王室蔚爲名卿非母之賢而能然哉若太淑
人者是宜銘銘曰

天欲生賢益人國必先令德施訓育於古爲教自胎
腹長而不遷乃習熟吁嗟揚母真令淑相天歷艱儉
自服撫成尚書國器夙官箴在堂日祇肅天爲作善
畀全福見子八座厚食祿龍章褒錫恩燁煜况成大

志惠里族勒銘玄室流馨醜

封恭人秦氏墓誌銘

都察院左僉都御史黃巖劉公舜弼巡撫河北歸之
明年爲嘉靖壬寅五月二十七日喪厥配秦恭人于
家公哭之哀明年 月 日祔葬於先墓韓山之陽
而其子貢士承裕入京師泣告子曰承裕奉父命乞
吾母之銘所以慰吾父之思也予悲其言不能辭按
狀恭人秦氏世家山西蒲州父諱某仕至陝西按察
副使初按察公爲御史居京師與刑部郎中劉北村
先生友善先生仲子今都憲未授室間以婚請按察

公諾焉秦家蒲劉家襄垣兩翁雅相契合婚媾惟良
不以千里爲遠也恭人歸劉氏年十六而內外稱其
有禮事姑張夫人每飯必親操釜鬻烹調之不敢以
他事解而姑安其孝都憲未第時家稍不繼恭人即
脫簪佐費及舉進士改翰林庶吉士授給事中旋以
言被謫稍弗懌恭人趣之泣任曰君豈不安於命哉
其後歷藩臬至今官恭人皆從行隨事規益而夫賴
其助此公之所以哭而哀者也恭人卒時年五十有
二生三男子長承裕冠弱冠舉于鄉次承華承祥劉氏
自北村先生科第起家伯子紫巖公仕至吏部尚書

予與同官翰林歲丁丑與都憲同校文禮聞契分夙
厚故銘也不可以辭銘曰

懿哉夫人婦所宗以榮繼與繫其功姑嫜內事竭孝
恭相厥君子敬以忠關睢雞鳴有古風孰窺其庭肅
而雍衆胤象賢當奮庸惜哉中殞壽不崇韓山峨峨
鑿斯宮勒詞鏡石垂無窮

封安人陶氏墓誌銘

臨守徐君用中之母封安人陶氏以嘉靖癸未十一
月二十八日卒于常州之私第方是時安人年六十
九矣先是君日謀歸養疏再上求致其事不得請常

悒悒不自聊及聞訃袒括號慟以書告其友嵩曰微
官羈人爰及大故傷哉卜明年甲申之十一月某日
附子考建安訓導封刑部上事諱某之墓而屬嵩誌
其葬按陶氏常州武進人安人之考武岡州學正諱
永以行義聞于鄉博極羣書尤邃於經及門受教多
名士安人生于武岡之學舍少則淑慧以習於父母
之教也故能通書史大義仰俯有儀以閑於婦之則
也故舅姑謂得賢婦妯娌敬事慕其所爲以爲女師
以安於夫之貧也故績絰儉勤出奩具以相其費而
不言刑部素伉直非非是是無所苟合爲建安督課

諸士以嚴安人曰是吾父嘗然及聞其數以言作
司則止之曰卑位佞言非福也盍歸乎刑部由是罷
歸以就其子之封蓋孺人之爲女爲婦者如此生子
四人長學蚤卒次即臨江君名問用中字也次思次
辨臨江庶靜而文志期古人於世所謂毀譽欣戚一
不以屑意蓋有以自養者識者以是知母之能教也
女二適劉宗陽吳仁孫男四天叙天秩天衢其一尚
幼銘曰

命於朝寵服以宜里有色養婦子嘻嘻殖祿考終無
盛與夷仕則遠違朝夕孔悲刻銘幽宮慰其子之思

考

太孺人阮氏墓誌銘

太孺人阮氏故儒家女延平守孫公諱某之次室實
生今春坊中允承恩嘉靖初元 上登極推恩以受
今封太孺人始入門事嫡姚宜人得其歡心姚嬰未
疾臥床褥太孺人晨夕侍湯藥靡懈病亟以子曰恒
甫者囑太孺人曰是累汝矣可善視之太孺人鞠養
顧復以有成立延平公即世內外多故太孺人幹理
勤瘁中允君以故得專方問學起家進士入中秘文
譽著聞于時太孺人性煦煦慈愛婢僕不忍譴呵

必預治服履遺之見里中寒餒者愀然憐之而廉
之身務儉約寸銖尺帛不忍妄費雖受封冠帔朱袍
罕御以布素終其身焉初中允君官翰林乞告歸侍
久之不忍去太孺人屢趣之曰爾荷國恩宜自効毋
以我爲念中允君不得已行歲餘輒復思歸嘗冊封
安南及校文南畿皆假道一歸省最後則疏乞終養
詞甚懇切 上許之歸踰年太孺人卒享年七十有
七於是太孺人稱備福中允君稱孝矣孫男克紹克
懋次尚幼明年某月日葬蟠龍塘延平公之墓中允
自述狀以予舊同史局來請銘銘曰

金山堂集 卷之三
孰昌厥家萬福攸始奕奕宮臣夫人之子匪家之昌
維國之光爰以子貴 錫命斯臯維詔後人刻銘以
葬

安人周氏墓誌銘

安人周氏泰順知縣劉君桐之妻南京刑部郎中夢
詩之母也刑部以主事初考例得貤封其親當是時
泰順自守其職毋獨被勅有今封曰安人云安人靜
而正儉而禮上承下御無不得宜蓋泰順爲諸生也
貧而專於學既領鄉薦爲校官河南夏縣浙天台廩
邑其貧猶然也而敦學弗怠安人能以勤儉相之統

續綉綴敝衣非食未嘗有怨尤怫感之色已而君擢
宰淳浦恭順兩邑及子成進士官十朝豐顯矣安人
處之未嘗易其素也泰順始迎二親至官邸食其祿
其後春秋高不能復至安人獨留家以養敬恭朝夕
未嘗有違志而舅姑安之忘其子之在外也安人生
子四人長即刑部次夢禮夢賢次夢弼蚤世嘉靖甲
申四月十八日安人卒於永新之私第年五十有四
蓋刑部敏銳踔絕弱冠筮仕劇曹迅邁有聞遠且大
求文也而安人弗待矣生成化辛卯九月二十四日
葬於某年 月 日墓某山之原銘曰

金
借其約弗墮樓處其爲臚弗銜盈德維令慶以增刻茲
銘美可徵

封安人高氏墓誌銘

安人姓高氏福州候官人封戶部主事莊君文玄之
妻南曰守惟春之母也曾祖諱旭提學江西按察僉
事祖諱某承事郎考諱某清遠教諭安人在家以能
事其繼母爲父所鍾愛歸于莊能以事父母者事其
舅姑舅姑安之其處妯娌和而有禮其御臧獲嚴而
有恩雖處豐裕其自奉養未嘗擇衣食其治賓祭中
饋之事既老猶身親之家衆有能者不付也戶部

曰余教桐江瓊海出而訓課諸生樂與賢士大夫遊
能不以內事嬰吾慮者吾妻有助焉耳比余乞休歸
吾妻喜慰過於居官蓋世人之所慕榮與利者安人
無嗜焉其端雅修潔天性獨得也生二子惟春舉進
士筮仕戶曹歷知黃州南安南昌三郡治行稱最次
惟楨安人以嘉靖五年七月十二日卒于家春秋五
十有三明年某月日葬于某山之原於是戶部自述
其妻之世出行事授之南昌以來乞銘銘曰

陰教之興女有圖史師氏命之罔匪內事世弊俗嬗
茲道以弛於惟夫人稟受天至非食卑躬靖慎明智

言循于經行協于軌弗勸而能允也女士配淑胤賢
有顯厥世尚配古人輝光無止

封宜人范氏墓誌銘

宜人范氏太平知府龍公夔之妻太常寺卿暹之婦
上林苑監蕃育署錄事復初醫學正科復祚鄉貢進
士復禮之母也范氏之先蘇州常熟人祖隸尺籍於
錦衣衛遂家京師是時太常公以能書直內閣兩家
往來宜人之父諱願知太守必貴故歸以其子宜人
入奉舅姑并曰親操恭儉有制外內稱賢太守始領
鄉薦累上春官不偶不能無尤感之色宜人數慰喻

勞勩之日幸無墮所業觀君器貌豈得終抑耶其後
果舉進士高第歷官郎署出綰郡符勤慎著稱皆宜
人有助焉生子四人其季復祐亦例受冠帶蚤卒女
一適都憲高公仲子祚孫男四曾孫男一於是太守
謝政歸卒十餘年矣宜人壽至七十有七見其子列
仕籍名薦書諸孫玉立衍衍愉愉媚于朝夕嘉靖丙
戌四月十七日卒于宜春之里第是歲九月日啓太
守公之壙而合葬焉其葬也諸子以銘爲請銘曰
有幽新宮袁水之鄉曰嬪邦侯終也同藏吁嗟夫人
有德有祉異恩斯來吾見其子

封太孺人呂氏墓誌銘

太孺人呂氏世家鎮江贈監察御史曹公諱綬之妻
南京太僕少卿倣之母年七十三以嘉靖癸巳三月
十日卒明年十月某日葬墓某山之原子三人長即
太僕舉進士爲御史才名聞于時仲曰倣其季曰儒
蚤卒女二適林禧施良孫男六人恒悅忱恬懷慎孫
女五人適朱節費忱王思范曉錢某太孺人明慧而
仁恭慎以有禮始入門事姑嚴氏承顏色教令能得
其權相御史公得輔佐之宜公蚤世撫教諸子備歷
勞勩曹氏中落矣乃豐顯裕盛子姓蕃衍有今日實

太孺人之力焉將葬太僕以予同年友也故來屬以

銘銘曰

油雲蒼施百穀泄泄相我御史夫人之懿夫人頎頎
明飭靜嘉蓄澤肇祥以啓有家爰有美子維國之華
爲中執法糾慝正邪出使入侍里第來過車服駢羅
京江之涯 皇有命書金葩玳首閣老宗工撰言爲
壽刲牲考鍾黍稷籩豆告其先人奏假在廟京人聚
觀太息嗟咨誰之瘁矣碩茂榮滋偉歟夫人德實致
之于前有繼于後有貽詵詵諸孫服習書詩考終得
願萬福如茨其來未艾視此銘詞

監察御史朱君妻封孺人墓誌銘

御史朱君士光奉命按吳道聞其配姚氏之喪泣自書狀走使入金陵以來請銘曰吾妻新昌人宋狀元勉之後也自其爲女十一歲無母能事父而孝理其家而整撫其幼弟妹食飲衣服不失其時比歸予年始十六能以事父者事吾先大夫太恭人以理父家者理吾家予少也宥多疾吾妻規諫調護有隱德焉尤能相勉以勤于學夜讀宿膏火進飲餽有常度子成進士令旌德海鹽二邑吾妻皆隨能扃舍以嚴母惟市蔬必記籍至門擊析咎錙納焉僮母得踰閩海

臺也前之爲令多坐累弗振其得以御史存者
自予始使予守官幸免於過者抑吾妻之助也吾居
臺遇事利病得失未敢以嘿即涉譴佛叵測或憂之
吾妻弗吾過也及予免先大夫喪將入京則止之曰
君言職也顧今得言耶尚出耶往食祿而憂曷若守
此田里逸身而薄享以遺爾子孫也是歲庚辰先
帝南巡郡邑繹騷而嘆曰我爲婦人而得從子隱幸
矣其智性明識理道多此類予居再期今上登極
乃出出後巡離山西一年入臺又一年乃有今命斷
取道還家而吾妻亡矣悲夫吾妻之葬也子其爲我

以銘嵩嘗觀於今士大夫材行器業有聞于時非獨
自樹礪要亦有內助焉然內行弗克彰觀其夫所既
立與其所稱而思者其賢可知矣孺人生子一人曰
誥女一人適吾友傅御史冠卿之孫纓期年而纓卒
誓守不二孺人憐其女之孀也數勞苦慰勉之從其
志生某年月日卒嘉靖三年二月二十六日得年四
十有八葬以某月日墓某山之原銘曰

姚世望筠篤生夫人邦伯維舅御史是孀少則來歸
已享其實匪貴之享職縫主饋兩邑之治去常見思
臺中之議曠焉弗隨維克相之厥聞以馳約取深慮

亦審其時士也則難矧女之爲曷以傳之矧此銘詩

鄉進士唐君妻朱氏墓誌銘

唐與朱同望晉寧而同出於浙江之嚴州其先在

國初俱發戍雲南中衛領屯種由是居晉寧兩家同
里閨相好也孺人之父諱克瀛景泰中領省薦仕定
州訓導克諱鳳成化甲午與唐君以敬又同領省薦
以敬爲其子佐擇婦聞孺人賢遂委禽焉蓋孺人之
未行也克閑內則鍾愛於父若兄稱賢女既歸也舅
判成都從姑在宦邸孝謹無違禮稱賢婦相其夫力
學有文領弘治壬子省薦克世其業稱賢妻迨其夫

之歿也執舅與夫喪稱未亡人遺孤者三長曰鉞次
曰錡次曰鑄皆甫髫髻稱保抱携持矢濟艱難而迄見
其子之成於是稱賢母焉孺人生成化辛卯十月十
有七日卒嘉靖戊子二月二十有五日年五十有八
錡舉進士甲科觀政戶部聞孺人訃奔歸以明年己
丑某月日合葬于某山之原予教國子錡爲諸生館
下知其文行奇之故孺人之葬也錡拜泣奉狀以請
予銘其友戶部主事孫君道夫實著狀捐之以請乃
爲銘曰

誨子而彥服位在朝弗享其榮昔也劬勞

世則多矣

云胡弗悲猗嗟孺人銘永其垂

華母傳

華母孺人姓鄒氏常州無錫人也華與鄒同望于錫
兩家皆豐財產而孺人之父曰某娶王氏尚書文肅
公女也孺人始往來外氏容櫛端雅進止有度文肅
異之於是華處士東洋君久無子晚得子曰鯨愛之
為擇所配聞鄒女賢而文肅於華君故厚善即媒往
求焉議以克協孺人來歸上下莫不贊賀姑年高有
疾孺人事之怡謹盡孝或淹月衣衾不釋姑臨終祝
曰新婦事我善願新婦有子婦亦如新婦善事我也

東洋君卒鯨治瘞與祭成中禮孺人實相之而鯨下
果人也遇事敢敏直氣昌辭乞乞期自樹願遭訟繫
連歲不得白白歸乃以疾終孺人含茹悲苦公私酬
應持危舉墜督教諸子使就學爲鄉里善士東洋君
之業弗衰焉初鯨生子八人女五人而側出者四男
一女孺人愛視之如一孺人性約素服御取給則止
家嘗火什器俱毀孺人無戚感之色曰物存毀有數
惟省已答譴而已孺人卒時年五十有七八子者長
曰延壽次延禧延慶延祚延禮延福延祿延緒
論曰先王之世非獨外治蓋亦有內教焉故女子必

有師圖史陳誠蓄德勤志化行閨門後彤史職廢婦
則姆訓不及於家若今鄰孺人之賢無假輔告動應
禮法非其待於天性然歟抑陶淬漸習族類顯碩有
自哉

金山堂集卷第二十三目錄

碑 阡表

勅修棗林祖塋紀 恩之碑

嘉林阡表

慈德阡表

太子少保吏部尚書恭肅周公墓表

南京戶部尚書約菴周公墓表

贈尚書實菴胡公墓表銘

畜德發祥之碑

鈴山堂集卷第三十二

碑 阡表

勅修棗材祖塋紀 恩之碑

惟我祖考純德府君既卒且葬之三十有八年其孫
嵩叨爲 天子輔弼之臣既得 賜誥累贈府君少
傅兼太子太傅吏部尚書謹身殿大學士惟是先塋
在故鄉蕪陋久不治蒿謹具疏言臣少失怙賴祖教
育成入臣甫得第祖隨故彼因貧乏聊且營葬每圖
改遷未能如願此臣平生固極之懷比聞塋被水嚙
愈加傍徨弗克寧處切念臣祖荷蒙 皇上推恩賜

官一品而丘壠荒穢有同民庶臣怛焉割中不孝之
罪無所逃焉顧臣以職守未敢暫離即欲改葬無可
託之人伏望 聖慈矜察暫准男少卿世蕃回籍代
理其事存歿感幸之至 上曰嵩輔政有年勤勞素
著伊祖驥著工部遣官造葬仍賜祭二壇不爲例而
蕃 欽准賜假以行遣工部員外郎周薇董治塋役
遣布政叅議方任袁州府知府徐禎 諭祭雨露之
恩覃被幽壤山川草木俱有榮耀焉蓋今臣寮父母
授封者例得祭葬至於上逮其祖 卹典追賜則前
無此比也於是蕃恭捧 綸命抵家用特牲告于府

君之墓垣既壞而謀諸宗老謀諸姻戚及諸士大夫咸謂體魄安厝已久輕動非宜惟增拓規制修飭墳欲視塗後水所衝當之處實以厚土周迴繚以崇垣中闢神道樹諸錫之碑前作拜享之堂凡所建造一從典制以丙午四月始事十月迄工闕壯遂固風氣完萃鬱然改觀矣蕃事竣還京臣父子詣闕下頓首謝乃涕泣言曰嵩也不天早失慈笑笑然孤童子也不自意遭際聖明致位崇顯獲微寵靈以追崇其先豈當之能定賴我祖宗積德餘慶之所致也維我高祖平養府君位至方岳邁績

儲休寔啓有家肆及我 祖蓄德行善志樂布韋不
求聞達財讓諸父橫逆不仇 厚惠施不可殫述語
在汪太史誌中雖生平遵晦一命永泊而褒大顯榮
荐加身後然則天之福善旣久益章詎不有徵也哉
惟嵩之弗類忝竊高位受 上殊券報稱未能徒感
且愧謹叙述 鴻典爰識歲月勒諸貞石昭示方來
世世子孫仰戴 天恩於無斁云

嘉林阡表

嘉林者嚴氏之先塋在焉岡阜濼旋慈不深委說者
謂爲吉壤故名嘉林云始自子曾六父今贈少傅

諱璉葬于斯弘治乙卯先君歿其年八月十五日祔
于斯先君歿後五十年以嵩入內閣累贈至光祿
大夫柱國少傅兼太子太傅吏部尚書護身殿大學
士初任禮部時先君贈太子太保得學士張肩川先
字為撰神道之銘迺今錫命有加迺再伐石樹墓上
以昭聖恩而不肖蒿泣血自為識曰先君歿時不
肖孤年甫十六是歲寔當大比提學莆田黃先生按
縣既考預就試矣先君忽遘疾度不起撫而語之曰
吾期汝一第以成吾志今若此命矣又曰凡學不日
進則日退業無隳於垂成志固盡於自足即汝他日

獲成吾志者吾目瞑矣言已潛然而泣嗚呼今尚忍
言哉先君能詩善屬對性嚴毅弱冠出教童蒙諸生
櫛楚不少貸不肖始能言坐置膝上口授之書督課
寒暑不輟不肖方亂書史皆成誦亦能爲文先君喜
語先夫人曰惟教此子他不足計也乃益禮致良師
訓之集諸學徒而館籛之雖貲耗弗計鄉人群驩誚
之忌者計散其徒以撓敗之而先君志益堅先夫人
忍貧助之亦無少懈鄉邑鮮得異書間得一書手自
抄錄俾習讀焉常曰世人恒市腴田以遺子孫吾惟
遺汝一經用世澤物具在此矣因自號仰雲以見志

嗚呼此先君之爲教不肖如此也先君歷覽史傳嘗
舉古人孝義事而力行之得一甘肅不奉親則不先
嘗處二弟犯侮弗校其遜忍有人所不堪者媿族有
急難援赴恐後家無餘蓄而輟已以調匱乏常如不
及然性疾惡數面斥人過里中有爲不善者惟恐先
君之聞之也人有售田者增直償之曰彼爲貧也多
行善事而口不言曰所謂陰德者施於冥冥不求人
知耳比卒遠近聞者嗟悼不置遠方遊士泣造墓下
瞻禮而去日相續人始知先君有隱德云嗚呼此先
君之爲志行如此也嵩也將何以克紹先德而敬承

明訓也耶先夫人晏氏慈德淑行別有表蓋先君歿後三年不肖舉于鄉又六年成進士列官于朝初贈先君翰林編修加贈禮部左侍郎又贈南京吏部尚書又贈太子太保禮部尚書兼翰林院學士五贈今官於是不肖孤泣而言曰古所謂賢人君子者非有甚高難行之事也惟以不失其良心克全夫天理民彝之正耳事親孝兄弟友待物仁臨財讓急困義無爲其所不爲能忍其所不可忍雖鄉魯上賢之至行不過此耳惟是數者先君實允蹈之宜有貴位享遐福而年纔四十有二齋志以歿不亦悲夫雖然幸

賴 聖天子推錫之典穹階顯號榮寵光大賁於無窮語曰爲善無不報而遲速有時信哉昔在乙未之歲不肖孤以南京吏部考績過家獲躬掃先塋稍加闢治詎今又十年始克以一品追命之榮刺之珉石而具列先君行義之槩以表諸阡以志夫小子蒿之遭時竊位幸有今日者皆仰承先君之遺云耳嘉靖二十六年歲在丁未四月旣望男特進光祿大夫柱國少師兼太子太師吏部尚書 謹身殿大學士黃 謹書

慈德阡表

惟我顯妣夫人之歿且葬距今三十有九年矣不肖
出從仕坐域曠焉久弗治嘉靖丙午男太常少卿世
蕃蒙 恩賜假歸廼命以特牲告墓涓日鳩工畚土
芟藪闢其式廓壤樹封植增厚而勒石題曰懿德之
阡旣不肖孤泣血自爲識曰夫人姓晏氏世家新喻
祖諱大章以富聞嘗出粟賑饑 種書旌其門考諱
仕望鄉里稱善士不肖聞諸宗老曰夫人來歸事舅
姑盡敬養之禮饜饋必親執事必率先曰吾家婦也
處妯娌無犯迂之氣取與必以讓 侍親黨敦睦端仁
恤之行惠愛必周恭惟 先君孝友毅直動式古訓

勇爲義而性於利雖此至性抑夫人有相之道及先君教不肖歷艱匱之苦不幸先君見背撫其遺孤含茹辛楚抱烝烝之戚當此之時親屬橫侮屢至夫人但安受曰蒼蒼者俟其定也不肖孤免喪踰年幸領省薦夫人悲不自勝曰先君弗及見也及上春官繼戀不忍別母子相持悲泣見者爲惻旣幸舉進士入官翰林迎夫人就養居二年以先祖之喪歸歸又明年而夫人疾奄至大故荐罹酷罰呼天之痛無所及焉夫人慈愛異甚當疾革尚慮傷子之懷給以少間絕時眈眈者久之嗚呼痛孰甚歟夫人生正統丁

卯二月二十九日卒正德己巳六月二十五日得年
止六十有三以明年庚午八月二十八日葬于里社
下金鉤形與先君嘉林之阡異兆而相望先是霖雨
彌旬當葬之日白日杲杲葬畢雨復如初夫人以不
肖貴仰荷 聖恩推錫累贈至一品夫人然念少也
孤雖得祿仕先君弗逮養母雖逮養弗久且初仕而
貧卒之日無以為斂不自意叨竊至今日受 上恩
渥祿賜豐盈飫其家人昔先文正有忍令若曹享富
貴之語予同其情焉爰述斯文以示子孫以志吾終
天之哀其諸懿行見於侍讀徐用峯先生所述誌則

不復書云嘉靖二十六年歲在丁未四月既望男具
官嚴嵩謹書

太子少保吏部尚書恭肅周公墓表

太子少保吏部尚書周公以嘉靖丁未正月二十九
日卒于位 皇帝既加贈太子太保謚恭肅賜之
祭命以其喪乘傳舟濟而歸已又遣有司治其葬地
於是嗣子國南乃請予表其隧公之爲南司寇也蓋
致其政且數年矣其復起而爲司空治河于濟俄兼
右都御史而督漕于淮當是時 聖天子將大計朝
吏之治而汰其不肖者而都察院吏部實柄其事於

是召爲左都御史掌院其明年合凡京朝官聽察其
賢否去留之而公則欽承 聖天子明命詳爲廉覈
留其賢者而降黜其不肖者天下翕然謂至公至明
而吏治一清又明年進冢宰掌銓而大計天下之吏
亦然然爲宰纔兩閱月以疾告遂至不祿天下惜焉
公世吳江人諱用字行之初舉進士授行人以材掄
爲南京兵科給事中丁外艱服闋改禮科遷廣東叅
議浙江按察副使丁內艱服闋改山東臨清兵備尋
遷福建按察使河南右布政使拜都察院右副都御
史提督軍務南贛居二年召管院事未幾陞吏部

侍郎轉左以誑誤調南京刑部右侍郎明年轉南
都察院右都御史管院事陞南京刑部尚書會 廟
災自陳致仕乃復起而至正位冢卿前後歷官蓋四
十餘年所泄有茂功馨名其詳具狀誌余不論論其
大者正德間天下所疾苦莫如逆豎妖僧然時方用
事氣勢薰灼人莫之敢嬰公獨抗疏諫迎西番法王
及劾中貴人擅政不法乞貶竄以謝天下處嶺以南
最久蓋人人有父母之愛番禺盜作亂親履行間督
兵剿之級幾千號有大蹟然盡縱其所獲配類之可
疑者而不肯妄戮一人以彌千級之數又見其寮坐

未首功當免輒以已所斬級投而掩之以故公蹟
不見旌於朝而物論則歸之臨清多盜公諭使相
首免罪而盜以戢又抑鎮守中貴人橫征傳給民賴
其便洛中大饑公爲方伯清戎責不在已然急民之
窮不悉安坐以視則爲躬循閭閻設方畧賑而活之
盜萃汀贛之間爲患積歲公至不急捕告其屬各務
澄其源旣緩稅蠲逋而德化四流於是盜黨自悔欲
來乞生公因召令自翦其強不悛者而盜悉平民之
得所與否大抵係守令歲遣臺臣出按苟不舛於揚
激則守令得而民安矣公掌臺獨切切以誠臺臣故

事大宰典銓少宰察不與謂之。嘗曰公獨脫去。格忘已以相質。斷必當乃止。故世所羨。雖無不合於輿論。公素鮮嗜欲。官藩臬時。即獨居。不以家隨。是以既老益強。凡享年七十有二。曾大父景芳。大父瑄。父昂。皆不仕。而大父父則以公貴。贈資政大夫右都御史。二妣皆贈夫人。配施氏。封孺人。加贈夫人。子四人。國南右府都事兆南。太學生式南。乾南。縣學生孫男八人。孫女二人。公有至性。少時父母疾。嘗刲股進。愈之而絕。不以言及。後居二喪。哀毀逾禮。終三載。不御酒肉。端慤自持。不苟笑言。自律甚廉。自奉甚約。誠可

稱篤行醇德君子矣予昔在吏侍於公爲寮案雅相
愛以道義交也隧上之文雖微國南之請予猶將爲
之然不腆之詞美足爲公重哉庶以識予悼慕之情
云耳

南京戶部尚書約菴周公墓表

太子少保南京戶部尚書約菴周公以嘉靖丙午八
月八日卒明年丁未月日葬其葬也詔遣官諭祭營
兆域孤保有贈易名有謚於是公之子督府都事仕
請予書其墓道之石公諱金字子庚約菴其號也其
先周平王子封於汝以國爲氏至晉荊州刺史訪始

家于常州國初公曾祖彥居以間左起充實京師終
占籍金陵公既貴乃復居于常祖道信考廣實皆累
贈如公之官妣贈皆夫人初公以正德戊辰進士釋
褐即拜官瑣闥英資茂植膺受殊選更工兵戶三署
多所建白咸切事體中機宜若征寇方畧及將士賞
格皆見施行有都督馬昂者進女弟宮中公抗疏論
之竟得旨黜昂罷其女中貴人以迎佛監織暴橫而
諸邊鹽引奏討殊濫又武學生請更考察制並列狀
刺其違繆無所回疑又數請臨視常朝總攬權綱及
汰冗食募丁壯言雖不盡用時論偉重矣遷貳僕卿

晉參臺憲出撫延綏公乃招徠商粟以和糴勸督懇
田以賦租因地鑿渠以通水利慎險望繕城守績用
大著復晉左副改巡宣府大虜壓境親獎率將士畢
力禦之捷聞有白金文綺之賜已而以病告家居者
六載復以虜患詔即家起公巡紫荆等關公練暢戎
機備禦詳嚴虜以不害入爲少司馬遂陟長中臺往
督漕運 章聖皇太后梓宮南祔渡淮衆議由陸不
決行公力主從江之利而定改留曹大司寇復改司
徒歲乙巳乃以老得請歸明年遂卒享年七十九四
配吳氏封夫人子男二長卽仕其季偉也公志業

儼詞藻清敏而特有政事材觸之微隱而析慮克周
投之難遽而注措無撓自始仕至登八座凡更十二
秩三十有八年而居財賦兵戎之司爲多經綜之密
制置之詳識辯履霜斷收迎刃所至安其惠利衆務
罔不成集此皆當世君子所睹記也故茂烈勤于王
室閔畧著于邊陲聲名流衍於無窮有不待表而後
見者然老成淪喪著祭無從斯重可惜也故爲著其
大者俾表之墓上

贈尚書實菴胡公墓表銘

實菴胡公生洪武之丙子歿景泰之乙亥詎今閱九

十餘載矣其善積慶流自天申錫以有今南京兵部尚書南山公起家甲科敷歷中外勲望卓偉爲時鉅卿而胡以顯大語有之百歲種之以德觀于實菴公詎不信哉公諱崇信以字行江西南昌人也世居鳳凰坡下考曰彥良以居積富公善繼承多積而能施往往與人緩急聞義舉欣然從之嘗歲歉發粟五百石貸饑者例得冠帶及樹牌公謝曰行義而媒利非吾志也鄉人誦以爲賢生有至性事父母安其孝樂與高人處座客常滿雖座客常滿燕會止清談相樂戒勿作伎樂戲劇之事未嘗忤物終其身不與人訟

時里士曾一本有重名慎許可乃獨稱實菴公之賢
雅相契厚所居窓几明淨器物古雅焚香瀹茗琴畫
自適忠厚質朴以韋布終今尚書之篤厚清純悃悞
無華其觀法家庭蓋有自也嘉靖乙巳朝廷推恩贈
實菴公資善大夫南京工部尚書配吳氏贈夫人子
曰仲倫累贈亦尚書孫男三人長即尚書曰訓由進
士授行以歷御史僉事叅政布政積至今官以六載
考績特恩加太子少保次曰詔衍樂縣丞曰誥安寧
典史曾孫十四人長曰溥國子生次文清縣學生淳
驛丞文光文淵俱縣學生瀾洛沔洲汲淮汴汴汴孫

七人長曰時次旻中丙午鄉試承曉暉賜景余嘗觀
于史傳王烈當漢中興辭榮不仕躬耕以老至其孫
祥覽而世始大實菴公生當我明興運隱遯自甘
厚積不施以發於其孫矧曾玄繁盛福履悠長胡之
顯大非偶然爾矣將不頡頏匹沐王氏耶始公之歿
也墓未有表至是尚書以考績入京其狀屬予書之
以刻於墓上之石墓在南昌之灌城鄉塔子橋銘曰
胡始肇姓出自有虞而家豫章代業文儒於惟實菴
秉行貞孤神秀內蘊忠信外孚享不酬德竟老一隅
鄉有公平百歲範模有偉賢孫才爲時需旣掌邦土

復典兵樞濟指發祥如水斯滌如彼巨幹奕業弘敷
匡阜之南爰有重湖高阡崔魏水抱山紆德人之藏
過者式諸

畜德發祥之碑

少宰學士恭和歐陽公以歲辛丑葬其考巖溪翁于
萬安之獅嶺又十年庚戌奉其妣蕭淑人合焉則斷
石於墓前之享堂篆其額曰畜德發祥初公舉進士
守六安奏績得封翁如其官四言者 誥中語也公
自六安陟南部已而徵入翰林為史官為國子司業
祭酒以至今官掌詹府事又得贈翁及祖考如其官

妣皆淑人蓋至是天恩褒寵彌極隆渥矣公既以是名其碑而走書京師請余爲之文易大畜之象曰君子以多識前言往行以畜其德其卦之辭曰不家食吉利涉大川則知懷博達者積善濟之猷秉淵懿者存時出之用志得於漸鴻則揚輝天陸道行於遇雨則沛澤衆中所謂畜則發理也其或遜志殫於墳籍篤行邁於里閭井渫弗汲而川導其澤嘉木隱谷而榦達其榮所謂不在其身在其後人亦理也巖溪翁豪宕而不羣警敏而力學佔畢以呻日能累牘濡宅所就立可千言給廩寓庠有聲鄉校生徒從業濟濟

及門數奇弗售活焉而隱且蚤失所恃焉潯陽之
孝事繼母無履霜之詠讓產迎兄則趙彥霄之恭還
橐焚券則劉永一之義里人相卻喻之以理景王烈
之風嗣子入仕督之以廉慕姚璿之美此非所謂能
識前言往行而體諸身者耶是以少宰公夙擅庭芳
蔚稱邦彥守牧著績待從升華虎觀橫經 儲宮翼
善清階躋九列之崇寵錫被三世之命而彌綸襄贊
之業方起未艾巖溪翁雖榮不自躬而顯融光大自
少宰公發之所謂不家食吉利涉大川允合乎蓄之
道也已 皇綸所褒豈不有徵哉系之詩曰

惟天眷德厥惟有常道積施溥德厚流光或躬弗逮
迺胤而昌翼翼巖翁質稟英茂涵泳學海翱翔文藪
兩校著聲一第弗偶行乎鄰里孝義寔敦迪子以道
罔惑羣喧規仕諄諄庶仁之言爰有好逖克婉厥德
勤儉惠慈閑家有則寔啓括嗣邦家之特政邁方州
才雄詞苑辟雍作程宮詹視篆秩副餘衡望隆台鉉
再世三命 皇澤演迤荷歟德人天寶佑之褒詞隆
奕 皇則畀之孰云作善而過其施如彼嘉植碩茂
其枝如彼源泉百穀以滋永耀無極視此銘詩